

Segun Presidente di Camara di Comercio pueblo ta cansa di warda:

Actua awor riba e asunto di ‘un Aruba sin refineria si of no’

ORANJESTAD – Tur hende ta cansa di discusion y analisis y ta tempo pa actua awor riba e asunto di refineria na Valero. Esaki ta e consensus di e conferencia ayera organisa pa Camara di Comercio riba e futuro di Aruba sin un refineria. E presidente di Camara di Comercio, Jamal Mahawat Khan a splica BON DIA ARUBA cu hendenan ta cansa di e situacion. “Nan kier accion. Y mayoria di e comentario ta cu e refineria a cera. Get it over with y ban na e siguiente paso” Khan a sigui bisa BON DIA ARUBA.

ARUBA SIN REFINERIA Den un sala completamente yen ayera mainta, por a scucha un total di 6 orado. For di e propio presidente di Camara di Comercio Jamal Khan, e Secretario di Camara di Comercio Leo Maduro, un persona gradua di Liverpool University (Daniel Brete) cu a papia riba e facilidadnan portuario den haf di San Nicolas, Patrick Newton di KPMG cu a toca e tema “Aruba without the Refinery: Building Business value in a changing world”, Vernon Huerta di Ernst & Young, riba “Positioning of Aruba as

economic gateway between Latin America and the European Union”, y finalmente Michael-Leo van Romondt di Deloitte cu a toca e tema “San Nicolas re-branded and other possibilities for Aruba’s Future”. E evento mes a cuminsa mainta 9’or y a dura te merdia, interumpi pa un break y tambe un sesion pa haci pregunta door di publico presente. Algo cu e publico a sa di utiliza hopi bon mes y a trece un serie di preocupacion dilanti cu a keda discuti den e sala.

DOS OPCION

Segun Khan, e realidad ta cu tin dos opcion cu ta keda awor : Sinta warda 30 luna pa wak kico Valero ta bay haci, of tuma accion bo mes cu ta : Lanta un compania cu ta cumpra e loke cu Valero tin pa ofrece y traha un bon deal como un bon partner. E ta bira un asina yama coordinated ‘dismantling’. “Bo mester cuminsa un caminda. Ta e tecnologia berde cu por cuminsa funciona eyan” Khan ta sigui bisa. Tin hopi posibilidad cu a wordo menciona durante e conferencia cu ta interesante Khan ta sigui bisa.

KICO AWO

Despues di e conferencia di ayera, esnan presente por a tuma nota cu awor ta keda na Camara di Comercio mes pa tuma iniciativa concreto door di uni hendenan den e industria local y tene un ‘retreat’ riba e discusion aki. E hecho cu durante e lectura, e secretario di Camara di Comercio, Leo Maduro a bisa cu mester tuma cos den man propio, no mester wordo interpreta como si fuera cu ta bay actua como un vigilante, segun Khan. Ora cu papia di tuma destino den propio man, esaki ta nifica cu nos mes mester dicidi kico tin cu haci, y no loke cu Gobierno ta haci.

“E comunidad ta determina su destino hunto. Gobierno ta esun cu ta ehecuta esaki” Khan a sigura BON DIA ARUBA. Hopi biaha politicamente Gobierno ta mara y no por tuma cierto decisionnan. “Decisionnan cu por ta nan kier tuma pero no por pasobra e tin implicacion politico negativo pa nan” Khan a sigura BON DIA ARUBA.

MOMENTUM

E intencion di ayera tabata pa crea un momentum unda cu hende por y mester pone idea, cabes, placa y mas hunto pa



por cumpra e refineria, y haci algo activo pa drecha e situacion cu seriamente mester desaroja San Nicolas. Manera cu sr Khan a bisa, esnan den sala, tabata basta fada di e

situacion actual di sinta warda, y tabata kier accion awo. Pregunta ta sinembargo, con e accionnan aki lo mester cuminsa, ken por activa nan y con lihe e mester sosode. □